



Kommunitoqqat uterfigeqqissagutsigit allaffissornikkut aningaasartuutit qanoq allanngussanersut pillugit Naalakkersuisut nalunaarusioqqullugit Inatsisartut aalajangiiffigisassaattut siunnersuut. Nalunaarusiaq UPA2025-mut Inatsisartunut agguanneqassaaq.

(Inatsisartunut ilaasortaq Aqqalu C Jerimiassen, Atassut)

(Siullermeerneqarnera)

Siullermik qutsavigiumavarput Inatsisartunut ilaasortaq Aqqalu C Jerimiassen siunnersuummut.

Qaasuitsup Kommuniusimasoq innuttaasup kissaateqarnerisigit kommuninut marlunnut avinneqareernikuvoq. Taassumalu saniatigut nunatsinni piffinni allarpassuarni maannakkut kommuniusut avinneqarnissaat annertuumik oqallisaavoq.

Kujallermi takuarput, innuttaasut arlallit suliniutigigaat, Nanortalik nunaqarfittaalu immikkut kommuninngornissaa. Inuppassuit Tunumi ukiuni arlalillit nilliaatigaat, immikkut tunu kommuninngortinneqassasoq. Aamma Qeqqata Kommunია ima immikkoortinneqassasoq eqqarsaatigineqarpoq, Maniitsoq namminerisaminik kommuninngorluni.

Demokraatinut pingaartuuvoq, kommunit aggulunneri tuaviupiluttumik isummerfigineqannginnissaat. Iluamik misissueqqaartariaqarpugut, innuttaasut ersarissumik tunngavissaqarniassammata isummernissaminut.

Eqqaamassavarput, qanorluunniit aalajangeraluarutta pisortat aningaasaatigimmatigit. Innuttaasut akileraarutaat. Tassa imaappoq, kommunit aggulunneri ullumimiit akisunerulissappata, inuuniarnikkut pitsanngorsaanissat akileraarutinillu appaasinnaanerit ungasillissapput. Aammattaarlu Danmarkimiit namminiilivinnissarput ajornakusoornerulissallugu aningaasat isigissagutsigit.

Tamakku tunngavigalugit silatusaarnerungaassaaq pitsaasumik suliaqarnissaq kommunit aggulunneqaaqqissappata kingunerisinnaasai pillugit.

Taamatut oqaaseqaateqarluta siunnersuut ataatsimiititaliami susassaqartumi suliareqqitassanngorlugu innersuussutigaarput.